

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", broj 30/03, 42/03, 81/06, 76/07, 81/07, 94/07 i 24/08), a u vezi s članom 30. stav 1., tačka f) i stav 2. i članom 36. Zakona o plaćama i naknadama u institucijama Bosne i Hercegovine ("Službeni glasnik BiH", broj 50/08), i članom 48. stav 5. Zakona o radu u institucijama Bosne i Hercegovine ("Službeni glasnik BiH", broj 26/04, 7/05 i 48/05), Vijeće ministara Bosne i Hercegovine, na 71. sjednici, održanoj 29. decembra 2008. godine, donijelo je

## **ODLUKU**

### **o načinu i postupku ostvarivanja prava na naknadu za prekovremeni rad, rad u neradne dane, noćni rad i rad u dane državnih praznika u institucijama Bosne i Hercegovine** (“Službeni glasnik BiH”, broj 4/09)

#### **Član 1.**

Ovom Odlukom uređuje se način i postupak ostvarivanje prava zaposlenih u institucijama Bosne i Hercegovine na naknadu za prekovremeni rad, rad nedjeljom, rad u neradne dane, noćni rad i rad u dane državnih praznika u institucijama Bosne i Hercegovine, u skladu sa članom 36. Zakona o plaćama i naknadama u institucijama Bosne i Hercegovine, čl. 21, 22. i 24. Zakona o radu u institucijama Bosne i Hercegovine i čl. 96, 97. i 98. Zakona o policijskim službenicima Bosne i Hercegovine ("Službeni glasnik BiH", br. 27/04, 63/04, 5/06, 33/06, 58/06, 15/08 i 63/08).

#### **Član 2.**

(1) Zaposlenom u institucijama Bosne i Hercegovine koji, u slučajevima propisanim članom 21. Zakona o radu u institucijama Bosne i Hercegovine i čl. 97. i 98. Zakona o policijskim službenicima Bosne i Hercegovine, radi duže od punog radnog vremena (prekovremeni rad) pripada pravo na naknadu.

(2) Zaposlenom koji obavlja poslove duže od radnog vremena (prekovremeni rad) pripada pravo na naknadu osnovne plaće uvećane za 25% razmjerno efektivnom vremenu trajanja tog rada, koja se u pravilu ostvaruje preraspodjelom radnog vremena i to da za svaki efektivni sat prekovremenog rada zaposlenom pripada pravo na 1,25 slobodnih sati. Pravo na naknadu ostvaruje se na osnovu izdanog rješenja rukovoditelja institucije.

(3) Izuzetno, ukoliko priroda posla na radnom mjestu zaposlenog češće zahtijeva obimniji prekovremeni rad, te se u razumnom roku ne mogu stvoriti uslovi za korištenje slobodnih sati na osnovu prekovremenog rada, zaposlenom se može isplatiti novčana naknada za prekovremeni rad razmjerno vremenu tog rada uvećanom za 25%. Obračun i isplata naknade u ovom slučaju vrši se na osnovu rješenja rukovodioca institucije, a po procedurama mjesečnog obračuna i isplate plać zaposlenog.

### **Član 3.**

(1) Neradnim danom, u smislu člana 36. Zakona o plaćama i naknadama u institucijama Bosne i Hercegovine, smatraju se dani vjerskih blagdana za koje zaposleni ima pravo na plaćeno odsustvo u skladu sa članom 30. stav (4) Zakona o radu u institucijama Bosne i Hercegovine.

(2) Za vrijeme provedeno na radu u neradne dane, u skladu sa stavom (1) ovog člana, zaposlenom pripada pravo na naknadu osnovne plaće razmjerno trajanju tog rada, uvećano za 25%, a obračun i isplata naknade vrši se po procedurama mjesečnog obračuna i isplate plaće zaposlenog.

### **Član 4.**

(1) Noćnim radom smatra se rad u vremenu između 22,00 sata naveče i 6,00 sati sljedećeg dana u skladu sa članom 22. stav (4) Zakona o radu u institucijama Bosne i Hercegovine.

(2) Za vrijeme provedeno na noćnom radu, u skladu sa stavom (1) ovog člana, zaposlenom pripada pravo na naknadu osnovne plaće razmjerno trajanju tog rada, uvećano za 30%, a obračun i isplata naknade vrši se po procedurama mjesečnog obračuna i isplate plaće zaposlenog.

### **Član 5.**

(1) Državnim praznikom, u skladu sa članom 36. Zakona o plaćama i naknadama u institucijama Bosne i Hercegovine, smatraju se praznici u skladu sa zakonom koji donosi Parlamentarna skupština Bosne i Hercegovine.

(2) Izuzetno od odredbi stava (1) ovog člana, do donošenja zakona od strane Parlamentarne skupštine Bosne i Hercegovine, državnim praznikom, u smislu utvrđivanja prava na naknadu, smatrat će se praznici utvrđeni entitetskim zakonima prema mjestu prebivališta zaposlenog.

(3) Za vrijeme provedeno na radu nedjeljom i državnim praznicima zaposlenom pripada pravo na naknadu osnovne plaće razmjerno trajanju tog rada, uvećano za 35%, a obračun i isplata naknade vrši se po procedurama mjesečnog obračuna i isplate plaće zaposlenog.

### **Član 6.**

(1) Ukoliko zaposleni obavlja poslove duže od radnog vremena (prekovremeni rad) i ostvaruje pravo na naknadu u skladu sa članom 2. ove Odluke, isključuje se pravo zaposlenom na naknade za noćni rad, rad u neradne dane, rad nedjeljom i rad u dane državnih praznika.

(2) U slučaju kada je proces rada organiziran na takav način da noćni rad, rad nedjeljom i rad u dane državnih praznika predstavlja redovan rad (rad u smjenama i slično), isključuje se pravo na kumulaciju naknada, s tim da zaposlenom pripada pravo na najveći pojedinačni postotak naknade.

#### **Član 7.**

(1) Pravo na naknade iz čl. 2, 3, 4. i 5. ove Odluke ne primjenjuje se na profesionalna vojna lica, na koja se odnosi član 62. stav 3. Zakona o službi u oružanim snagama Bosne i Hercegovine ("Službeni glasnik BiH", br. 88/05 i 53/07).

(2) Pravo na naknade iz čl. 2, 3, 4. i 5. ove Odluke ne odnosi se na izabrane i imenovane dužnosnike i rukovodioce institucija Bosne i Hercegovine.

#### **Član 8.**

Za provođenje ove Odluke zadužuju se institucije Bosne i Hercegovine i Ministarstvo finansija i trezora.

#### **Član 9.**

Odluka stupa na snagu narednog dana od dana objave u "Službenom glasniku BiH", a primjenjivat će se od 01. 01. 2009. godine.

VM broj 234/08  
29. decembra 2008. godine  
Sarajevo

Predsjedavajući  
Vijeća ministara BiH  
dr. **Nikola Špirić**, s. r.